

TESADONICA YACNOCQUIDON ISTE I

Pabadon tauamboen chiaid

1 ¹Pabado nebi. Shubu dadpen icquid Tesadonica caid yacnocquido Nuquin Papabëdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubëdtan bëdamboen isquin bëdambo icmepashun —caimbi mibi. Ëbëd icquin Sidbano caidbëdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

²Naden mibi Nuquin Papa chianembi. —Tesadonica yacnocquido bëdamboen namequid yec mibi bëdamboshë iquec, Papa. ³“Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusën naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴Con utsibobimboecquido mibi neque. Tania. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenëdash naden. ⁵Ambembi chiaid chienquo icquin Esusën naid mibi chuibanondambi. Aden chuibanac Nuquin Papan Mayanën

tantiamiacpadomboen: —Abimbo caic —qeshun mimbi Esus tantiabenondac. Adembi Esus tantiamenuec Sidbanochedobëd bëdamboec ëbi tabadsho isun: —Adquid abimbo chuiquid nendac —quequin mimbi ëmbi chuisho tantiondac. ⁶Aden Nuquin Papan Esus tantiamiaido yec ëbi Nuquin Icbo yacpadec chieshtoenquo icsho isash mibitsen chieshtoenquo iccondac. Ëmbi Nuquin Papan chiaid chuibanac Nuquin Papan Mayanën namiacpadec cuishonquequin mimbi Esus tantiondac utsibon: —Padi. Chën —quequin comapenen chieshënquionobi. ⁷Adec mibi bëdamboec tabadaid chuisho tantiash min nidaidën icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembi tantiash nëid nidaid Acaya caid yacno tabadquidotsen adtiadquo icpac caosh. ⁸¿Anocquidonuidida mibi Esus tantiec bëdamboec tabadaid tantiapash? Padenquo. Mimbi chieshtoenquo icquin Esusën naid chuibanac nidaid utsi-utsiec yacno tabadquidon tantiac caosh. Adashic aidō mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —qeshun nëmbo icquido mimbi naid chienquo iccombi. ⁹Mimbi naid naden chuisho tantiombi. —Pabado chedon Esus chuibansho tantiash: “Nuquin

Papapadquid utsi nibēdec,” qeshun Nuquin Papabēdta Esus tantiabenac caosh. Adshun ambi papa quequin nacenaid aidon tantienquo yanac caosh. Aden Nuquin Papan chiapadomboen natiadquo yanac caosh —quequin chioshi. ¹⁰Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided cuidadec unēsacsho Nuquin Papan uincuemiaid Esus choec,” qeshun aid istiadquo iquec —quequin mimbi naid chioshi.

Pabadon bēdamboen chuibanondaid

2 ¹Mibi yacnoshon tauamboen ěmbi chuibanac Esus tantiaquid yanshun mimbitsen utsibo Esus chuibanondac. ²Shubu dadpen icquid Pidipos caid yacnoshon quēnēn nauedac ěbi mēyadec tsadboedi pudumeshun nidmiac mibi yacno nidshun Esusēn naid mibi chuibanondambi. Utsibo dadpeshun chieshēnubi Nuquin Papan namiapadomboen cuesambo icquin mibi Esus chuibanondambi. ³Ěmbi naidquo namenuendambi adodionda? Padenquo. ĚĒbi tantiamenuendambi chuibandionda? Mambi padenquo iccondac. ĚAmbembi chiaidtambi mibi chuibandionda? ⁴Mambi mibi abimbo chuibampondac. Matsesēn naidtedi tantiaquidēnquo Nuquin Papan: —Aidēn abimbo chuibantsiashe. Con Mado Esusēn naid chuibenequid icmenu —caidquo nebi. Adquid yec matses: —Mibi bēdambo iquec —cameteuidi bunenquo iquebi. Nuquin Papa: —Mibi bēdambo iquec —camenuembimbi ambi chiapadomboen naic. ⁵Ěmbi tantiapadomboen mibi namenuec: —Mibi bēdambo iquec —quenquo iccondabi. Min piucquid bednuen muaquin chiambo iccondambi. Nuquin

Papan isnubi abimbo chiondambi.

⁶Ě—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusēn naid tantiamenuembimbi bēdamboen chuibanondac.

⁷—Ěbi chuibeneta —Esuquidistun caidquo nebi. Adoaid icquin tsusio dapan chiabimboen: —Nata —quequin ěancabudquindambi mibi chuibandionda? Mambi padenquo iccondac. Anin bacuē nēishmenquo icquin bēdamboen namiabimboembimbi nēishmenquo icquin mibi chuibanondac. ⁸Mibi tantiaquiquin chieshtoenquo icquin Esusēn naid chuibanec yuec mibēd tabadondabi. Aden naic tabadec bēdambo iccondabi. ⁹ĚAda tantie, con utsibo? Aden Esusēn naid chuibanquin nidaidēn capuquid yua bitsibi tuscaquin shubumpi nacenendeniondambi. Mibi caic: —Ěbi menianiac aton piucquid naimēdnushe —quiash con piucquid bednuec chonoadteniondabi. Mimbi isnubi adondabi.

¹⁰Mibēd yec Nuquin Papan chiaid niaquenquo yec bēdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanēdashi. ¹¹Amēn aton mado: —Naden na —quequin nēishmenquo icquin chiabimboen mibi abentse-abentsen bēdamboen chuibanquin ¹²mibi bēdambo icmepondambi. —Nuquin Papan: “Icsatiapimbo icquid icmequin ěbēdi tabadmendambi,” quequin Esus tantiamiaido mibi nec. Adquid Nuquin Papan chiapadec bēdamboec tabadquid neque. Ambi chiaid niaquenquo yec bēdamboec tabadnuna —mibitedi cadeniondambi.

¹³Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantias Esus tantiaquido yanash aidquibidi chuisho tantias mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabadmequid yec mibi bēdamboeshē iquec, Papa —quequin Nuquin Papa chianembi. ¹⁴Nidaid Udeya caid yacnocquido yacpadquie chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshēnac chieshtoenquio iccondash.

Adomboembidi aid matses mibi yacno tabadquin chieshēnac mibi chieshtoenquio iccondac.

¹⁵Isadaidbombidi Nuquin Papan chiaid chuibanquido cuesun secapampic. Adembi Nuquin Icho Esus unēs uapac caondash. Adomboembidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin

¹⁶isadaidbon matses utsi isadaidpembo ēbi chuimetapiombo icpondash. —Esus tantias Esus Nuquin Papan bēdamboen isquin mibi cuidenquio iquendac —quequin ěmbi chuisho: —Padi. Aid chienda. Cueschitomane —capondashi. Aden ambi chiaid ěnenquio icquin niac-niacsho Nuquin Papan aido cuidquiendac.

Pabado istante bunaid

¹⁷¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquio icnuc mibi instantiadquio iccondabi. ¹⁸Adec: —Padpiden istanu

—quesho Satanasēn nac padenquio iccondabi. Padpidec: —Nidnu —quesho adembi. Padpidec: —Nidnu —quesho Satanasēn nacbidi padenquio iccondabi. Nēbi adecbidi mibi instantiadquio iquebi. ¹⁹Nuquin Icho Esuquidistu choan aidbēd tabadquin ětsutsimbi ispatsia? ěTsutsi isashini cuishonquepatsia? ěTsutsi isumbimbi: —Is. ěmbi chuibanac Esus tantiabenondaido neque —capatsia? Mibibimbi caic. ²⁰—Esus tantiec bēdamboec tabadosh —quesho tantias mibi tantiec cuishonquebi. Adembi mimbi naid isun: —Mimbi bēdamboen naondac. Mimbi chuibanac ēbi tantiabenondash —ēbi caindac Nuquin Icbon.

Istan, quequin Timoteyo chiaid

3 ¹Aden mibi tantiec: —“¿Mitsipadec tabadpec?” quequididsēqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ěbēd icquid utsi Sidbano chuiquin: —Timoteyo nidan nuquididsēqui icnuna —caondambi. ²Ěmbi: —Nid —caondaid Timoteyo Esus tantiaquid yec nuquin utsi nec. Ěbēdtan Esus chuibenequidquio nec. Adquid icsho nadopondambi. —Tesadonica yacno nidshun Esus bēdamboen chuibantan. Adembi: “Esus tantiec chieshtoenquio yec nadquie tabadquid nendac,” quequin bēdamboec tabadquin ismetan, Timoteyo. ³Aton matsesēn comapenen chieshēnac chieshtoshon Esus tantienquio yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴Aden mibēd icquin chuideniondambi. Adsho ěmbi chiacpadomboen nuqui chieshēnondash.

⁵—“Ēbi nidan chieshēnac ĩadecbidida Tesadonica yacnocquido chieshtoenquo icpatsiashba?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ĩAda ěmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. ⁷Timoteyon chuiboed tantiash bēdambo yanobi. Nēmbo icquidon chieshēnac shubiantiadsēcquo iccobi. Adboedi mibi caic: —Chieshtoenquo icquin Esus tantiosh —quesho tantiash bēdambo yanobi. ⁸Mimbi aden naid tantiash dayacquio yacnimboec iquebi. ⁹Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. ¹⁰Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹—Nuquin Icbo Esusbēdtan Nuquin Papan nēbimbobi ambo nidmepashuni —caimbi. ¹²Adec mibēd ictiadquo icquin Nuquin Papa mibi chianembi.

—Ēmbi aido tantiaquiacpadomboen utsibobēd tantianameta, Papa. Bēdiactsēc tantianantsēcboedobi comapenec tantianamequiota, Papa. Adembidi utsibotsen bēdamboen ismeta. ¹³Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icbo Esusēn: “Tesadonica yacnocquido icsambo iquec,” catiapimbo ictsias. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

Chidobēd bēdamboec tabadte chiaid

4 ¹Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuec bēdamboec tabadta —quequin ěmbi chiondacpadquiec tabadta. Nuquin Icbo Esus tantiaquiec adta. —Bēdamboec tabadosh —quesho tantiashun: —Adquiequi tabadta —caimbi mibi. ²Nuquin Icbo Esusēn namiac aidēn chiaidquo mibi chuibanondambique. Aid tantiaquiec bēdamboec tabadta. ³Nuquin Papan tantiamiacpadquiec tabadquidēn nadoquid yendac. Utsin chido chudenquo icquin aton chidouidsēqui chudquid yendac. Adembidi chidon dada utsi chudmenquo icquin aton bēnēuidtsēqui chudmequid yendac. ⁴Adec Nuquin Papan chiaid niaquenquo yec abi bunaid mēmunc dada ambi inaidquo aton chidouidsēqui chudec aidbēd bēdamboec tabadsho: —Bēdambo iquec —catsiash Nuquin Papan. ⁵Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac.

Adembidi Nuquin Papa tantiesa icquin chidon utsin shui bunquin aton bënëpenquoio chudmendac. Adec tabadenda. ⁶Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacpadomboen. ⁷—Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquoio. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. ⁸Aden chuiquin aton Mayan nuqui menequidën Nuquin Papan chiaid chiec nebi. Aden ëmbi chuiboed niacquin Nuquin Papan chiaidquido mimbi niactsiac.

Adecbidi tantiananquiota, quequin chiaid

⁹—Bëdamboec tantiananta —quequin padpiden chienquoio iquembi. Nuquin Papan tantiamiac Esus tantiaquido yec mibi tantiananec. ¹⁰Min nidaid Masedonia caidën tabadquido Esus tantiaquido utsibotedi mimbi tantiec. Mibi yacpadquiecbidi tantiananquoquin utsibotsen tantiaquiota. ¹¹Ëmbi chiondacpadquiec chieshëmënenquoio yec bëdamboec tabadta. Utsi icsauidi chienquoio yec bëdamboec tabad. Chieshenquoio yec dayacquio yec chonoadta. ¹²Adash bunenquoio mibi ictsiac. —Con na nacnenambo iccombique. Mitsana beccho —mibi quenquoio ictsiac. Mibi adquio icscho isash Esus tantiesabo: —Esus tantiaquido bëdamboec tabadec —quetsiash.

Esusën abi yacno abi tantiaquido buante chiaid

¹³Tantia, con utsibo. —“Esusën abi tantiaquido uincuemendac,” quequin chuisho mimbi tantiabi icnushe

—queshun mibi bëdamboen chuinu. Esus tantiesabo: —Ëmbi tantiaidquio padpidec isadenquoio iquec —quec yuecquio shubiacbimboec shubienda. —Ëbipadquid Esus tantiaquid Nuquin Papa yacno istuidendambi —quec ma yuecquio shubianenquoio icnueshun Esusën uincuemete mibi chuinu. ¹⁴—Unës uaqui Esus uincuenacpadebidi nuquitsen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵Tantia. Nuquin Icbo Esusën chiaidquio mibi chuinu. Nuquin Icbo Esus nidaidën padpidec chonoc aid istuidec Esus tantiaquido unësabi icquido abia nidenquoio iquendac. ¹⁶Padenquoio icnubien Nuquin Papa yacnuësh choec Nuquin Icbo Esusba nua cuëdtuidendac. Adnubien Nuquin Papan abi yacnoshon uaido mayan bëdabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uaquin uincuemendac. ¹⁷Adoquien aidobëdi Esus tantiaquido unësabi icquido tsidadash aidotedi abuctoendac Nuquin Papabëd tabadec nidec. Abitedi abuctoquimbi abi bëquedec Esus chosho istuidendac. Adash Esusbëd Nuquin Papa yacno nidash anobi nuqui quenenendac. ¹⁸Ëbi adsho tantiashun nadota. Aton matses unësaid tantiec shubiquido bëdambo icmenuen ëmbi chuiboed chuita.

Esus chote chiaid

5 ¹Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo

iquebi. Tantienuio iquembi. Naden mibi chiondambi. ²—“Nëid inchëshëmbi ampequid choec,” quequin tantiatipimbo yacbibmoec: “Aid ushën Nuquin Icho choec,” quequin tantiatipimbo icnuc Esus choaindac —quequin mibi chiondambi. ³Esus tantienquo yequi matses dadpen: —Cuesnanenquo yec nuqui bëdamboec tabadec —queshobien ambi: —Ëbi cuidendac —cacmaidënuio padpidec choshon cuidquiendac. ¿Mitsipadquo chido bacuë usunquid icpec? —Aid ushënuio tishëmbi —quequin tantiatipimbo yequi badedquo nëncuenec. Adecbidi ambi: —Choec —cacmaid Esus badedquo chosho abi tantiesabon cuenëntiapimbo iquendac. ⁴¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bëdamboec nuqui tabadnubi Esus chonoc nuqui dacuëdenquo iquendac. ⁵¿Pacuënëdacbibmoecquidoda nuqui nedi? Padenquo. Pabiate paposhquiacbibmoecnuc Esus bëdamboen tantiamiaido yec bëdamboec tabadquido ma nuqui neyoc. Adecbidi bëdamboec tabadnuna. ⁶Ushquin pabiaten tantienquo yacbibmoen utsibon Nuquin Icho Esus tantienquo iquec. Adece tabadenquo icnuna. —Esus tantienquo icmane —queshun nuqui icsate bunaid nainquo icquin mëmununa. Nuquin Icho chosho istiadquo yec bëdamboec tabadnuna. ⁷Esus tantiesaboen inchëshën ushquin tantienquo yacbibmoec iquec. Adquiecbidi tantiadenuen acte paëmbo icquid acquido nec. ⁸Adquidpenquo yec Esus tantiaquido yec bëdamboec tabadnuna. Nuqui icsate bunaid nainquo icquin mëmununa. Sondado: —Shocosh tsasimbo icquid

shictonquenu. Sicsenushe —quiacbibmoec icnuna. Satanasën Esus tantiamenquo icnushe. Esus tantiaquioquin matsesten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacbibmoecbidi icnuna. Satanasën icsamboen tantiamenquin chieshtomenushe. —Esus tantiasho cuidenquo icquin Nuquin Papan abi yacno ëbi tabadmendac —quequin bëdamboen tantianuna. ⁹¿Cuidnuenda Nuquin Papan nuqui Esus tantiamediac? Padenquo. Abëdi tabadmenuen Nuquin Icho Esuquidistu nuqui tantiamiac. ¹⁰Aidi abi tantiaquid cuidmenquo icnuec abided cuidadec unësac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiadobëdta unësabi icquidotedi adoendac. ¹¹Ëbi adsho tantiashun mimbi nabocpadomboembidi Esus tantiec bëdambo icnuec ëmbi chuiboe chuinanquiota. Adecbidi bëdamboec tabadec: —Adequi tabadnuna —cananta.

Bëdamboec tabadte Pabadon chiaid

¹²Esus mibi chuibanquido bëdamboen ista. —Nuquin Icbon chiacpadomboen chieshtoenquo icquin nuqui chuiquidën nuqui bëdamboen chuibanec —quequin aido bëdamboen tantiatia. Mibi nashunquidombo neque. Aidon: —Nuquin Papan chiaid niaquenquo yec bëdamboec tabadnuna —quequin chuisho bëdamboen tantiatia. ¹³—Nuquin Papan chiaid bëdamboen tantiaquidombo nec —quequin bëdamboen ista. Adece chieshëmënenquo yec bëdamboec tabadta. ¹⁴Mibëd icquido naden chuiban. Chieshquid icsho: —Mibitsen chonoadta —cata. Dacuëdsho:

—Dacuëdenda —cata. Esus bëdiactsëc tantiatsëcscho bëdamboen chuiquin Esus tantiamequiota. Dada padishquio icsho nashunta. Aden nëishenquio icquin abitedi bëdamboen ista. ¹⁵Utsin chieshënac cuidnänenquio yec bëdamboec tabadta. Mibëdtan Esus tantiaquidobëd bëdamboec isanquin utsibotsen bëdamboen ista.

¹⁶Aden Esus tantiec ënëdenquio yec cuishonquianeta. ¹⁷Adembidi Nuquin Papa chianequin: —Ëmbi chiacpadomboen ëbi nashunquin utsibotsen nashunta, Papa, —quequin chianeta. ¹⁸¿Mimbi chiacpadomboen Nuquin Papan nasho isunuidida mimbi: —Nuquin Papa bëdambo iquec —cape? Nadoac bëdambo ictsias. Bëdamboec tabadquin: —Mibi bëdamboshë iquec, Papa, —cac bëdambo ictsias. Daicsabudshumbic adembidi nac bëdambo ictsias. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsias. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹Nuquin Papan Mayanën Nuquin Papan chiaid tantiamiac pamumëdadbimboec tabadenda. ²⁰Aden Nuquin Papan Mayanën tantiamiac utsibotsen chuisho: —Mue nec —badedquio cainda. Chuishoba tantiata. —Nuquin Papan chiaidquio chuinu —quesho mamëshunenda. ²¹Adenquio icquin: —¿Nuquin Papan

chiaidquibida chuibaneque?

Tantiabono —cata. Aden tantiashun Nuquin Papan chiaidquio isbanta. Aden isbanquin abimbo chuisho tantiashun: —Ai, Nuquin Papan chiaidquio chiec —queshun aidën chuisho bëdamboen tantiata. ²²Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquio chiec —queshun aidën chuisho tantienda. Aidën chiacpadomboen nainda.

²³Mibi Nuquin Papa chianembi. —Matses bëdambo icmequid icquin mimbi chiacpadomboen aido name, Papa. Mimbi chiaidquio bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icbo Esusën: “Aido bëdambo iquec,” catsias, Papa —quequin Nuquin Papa chianembi mibi. ²⁴Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. ²⁵Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. ²⁶Ambocquido Esus tantiaquidotedi chuiquin: —Pabado chedon nuqui tantiaquieci —quequin chuiban. ²⁷Nuquin Icbon tantiacpaden chuiquin dada uaombique. Ëmbi dada uaobed nëid isquin ambocquido Esus tantiaquidotedi chuiban. ²⁸—Nuquin Icbo Esuquidistun bëdamboen ispashun —quequin mibi tantiembi. Padi. Aidtedi dada uaombi.